

Hai ALTERNATIVA!

en Sada

PROGRAMA ELECTORAL



**Alternativa
dos Veciños**



■ **Que é Alternativa dos Veciños?**

Alternativa dos Veciños é un xeito diferente de facer política. Somos un movemento progresista e plural que respecta ante todo a identidade ideolóxica das persoas. Un movemento asembleario nacido en Oleiros en 1979, formado por homes e mulleres que loitan por unha sociedade xusta e solidaria na que todo o mundo poida vivir dignamente.

A política de Alternativa dos Veciños fomenta unha administración pública máis transparente, máis áxil e comprometida coa veciñanza. Unha política desde abaixo, con vocación de servizo e feita por xente honesta.



■ O porqué da candidatura

A nosa Comarca e o concello de Sada están a vivir un momento crucial para o seu desenvolvemento. Unha oportunidade única que precisa dunha serie de cambios políticos e institucionais necesarios para tender pontes, asegurar a gobernabilidade e demandar de xeito conxunto servizos e infraestruturas que actualmente se atopan nunha situación precaria polo desgoverno e a desidia de moitos partidos políticos que gobernaron o noso municipio.

Propoñemos o artellamento deste territorio consolidado en forma de Área Metropolitana para ofrecer solucións prácticas ao desenvolvemento sostible, o emprego, o urbanismo, o transporte público... de xeito que xuntos lidaremos o pulo económico de Galicia.

Desde Alternativa dos Veciños queremos un cambio no rumbo das políticas que levan paralizando as administracións desde hai moito tempo. Precisamos dunha xestión seria e comprometida co local para xerar un futuro de oportunidades.

A nosa forma de xestionar o público está avalada por 40 anos de políticas eficaces na consecución do benestar. Non somos un experimento de laboratorio nin un partido de novo cuño só preocupado pola imaxe. Somos persoas comprometidas, dispostas a loitar por mellorar a calidade de vida, os servizos públicos e o benestar dos nosos veciños e veciñas. Chegamos a traer aire fresco e renovado á vida política do Concello de Sada.




■ Os nosos compromisos con Sada

1. Desenvolvemento Urbano Sostible

O Plan Xeral de Ordenación Urbanística é o motor do desenvolvemento dun Concello. Un documento que fomenta a calidade de vida e permite un crecemento urbano sostible no que o medio ambiente prevaleza sobre o cemento.

Defendemos un marco legal que permita a cada persoa saber a cualificación da súa propiedade e onde pode e onde non pode construír, eliminando a incerteza e establecendo unha legalidade que sirva como referencia.

O Plan Xeral de Urbanismo de Sada, para que poida desenvolverse, necesita ser modificado. Non se poden repetir os erros do pasado, que só benefician a determinados intereses particulares e especulativos. Sada necesita un Plan Xeral que garanta un crecemento sostible e amable co medio ambiente para que todas as parroquias teñan as mesmas posibilidades de progreso.



Alternativa dos Veciños conta coa experiencia de levar a cabo en Oleiros unhas políticas urbanísticas totalmente diferentes, que ademais de ordenar o territorio, posibilitan a conservación, a rehabilitación e mesmo a incorporación ao patrimonio municipal de edificios históricos, como podería ser o da *Terraza*.

2. Traballo Digno e Redución do Paro

O paro é unha das maiores lacras que azouta este país desde o inicio da crise financeira de 2008. Sabemos que as políticas estruturais dos gobernos europeos, estatais e autonómicos son as que definen os índices de desemprego, pero deben ser os concellos os que desenvolvan programas de colaboración para que as veciñas e veciños se integren con maior facilidade nunha actividade laboral a través de centros de formación, espazos para o fomento do emprendemento, obradoiros de inserción laboral, potenciación do comercio local e a hostalería, o fomento do consumo de proximidade e a posta en valor e defensa das traballadoras e traballadores.

O envellecemento da poboación fai do emprego xuvenil unha das grandes prioridades políticas. A crise elevou de xeito catastrófico os índices de paro nos máis novos. Temos a xeración máis e mellor preparada da historia, cun capital humano envexable. É unha irresponsabilidade permitir que ese capital se vexa obrigado a emigrar. Por iso debemos facilitar o asentamento de novas empresas en Sada.



Desde os concellos temos a capacidade de mellorar en parte eses índices de emprego na poboación e, desde o local, contribuír ao crecemento global. Desde Alternativa dos Veciños queremos impulsar o autoemprego, mellorar o asesoramento e a orientación laboral á mocidade e crear viveiros de empresas.

3. Benestar na Terceira Idade

As políticas de Alternativa dos Veciños dirixidas ás persoas maiores teñen como fin último a súa calidade de vida e o seu benestar, de forma inclusiva e participativa, transformándoos en protagonistas das súas decisións e outorgándolles a posibilidade de ter un envellecemento activo e dinámico na súa propia contorna.

Para isto é necesaria unha ampla oferta de actividades baseadas nas relacións persoais, na continua aprendizaxe, na actividade física e no coñecemento do seu medio. Estas actividades son a base para acadar ese obxectivo de vida activa nunha etapa na que a idade non ten por que ser un obstáculo. Por que non crear actividades nos centros de ensino público para que se relacionen maiores e estudantes?



Por outra banda, tamén existen situacións concretas e individualizadas que motivan a necesidade dunha serie de servizos de atención persoal, flexible, de proximidade, en definitiva unha atención que cubra todos os ámbitos para que os nosos maiores poidan vivir con dignidade. Esta atención é extensible tamén ás familias, suxeitos activos e cun importante papel xa que en moitos casos son os máis achegados os responsables do coidado destas persoas dependentes. As familias, e especialmente as persoas cuidadoras, precisan dun apoio emocional e persoal enfocado ao seu propio benestar con actividades específicas. Para asegurar o correcto desenvolvemento e atención destes axentes é preciso seguir levando a cabo e ampliar políticas tales como o Servizo de Axuda no Fogar, Comida Sobre Rodas, Teleasistencia ou os Centros de Día.



Este conxunto de servizos e programas desde o local, flexibles e adaptados a todas as necesidades deben estar orientados á consecución da mellor calidade de vida posible. As políticas de benestar social son o compromiso de Alternativa dos Veciños cos nosos maiores e coas súas familias.

4. Defensa da Sanidade e Educación Públicas

A imposición das políticas neoliberais, en moitos eidos da vida política, está a favorecer procesos de privatización nos servizos públicos, comezando desde os sectores estratéxicos da economía e rematando por servizos básicos e imprescindibles dentro dun Estado de Benestar como son a Educación e a Sanidade.

Aínda sendo estas dúas competencias autonómicas, desde Alternativa dos Veciños pensamos que os concellos teñen que levar a cabo unha defensa forte do sistema público de Sanidade e Educación a todos os niveis e loitar para que se cubran os servizos mínimos. Entendemos que desde a xestión do benestar da nosa cidadanía, os concellos poden tamén incidir na mellora do estado de saúde global. Propoñemos, neste sentido, promover a actividade física a través de actividades e obradoiros, mellorar os equipamentos deportivos municipais, impulsar campañas de concienciación para favorecer os hábitos de vida saudables... Todos os pasos necesarios que desde a Administración local podemos dar para enriquecer a calidade de vida dos nosos veciños e veciñas. Aspiramos a crear unha *Escola de nais e pais*, onde se reciba asesoramento a todos os niveis: persoal, educativo, académico, social... Tamén queremos loitar por un órgano de participación onde se traballe con representantes de todos os centros de ensino público do municipio para unificar criterios e mellorar a educación.



A Educación non formal é outro dos ámbitos no que os concellos poden e deben incidir para mellorar a vida cultural da súa veciñanza. A promoción de obradoiros e actividades municipais, a creación e o fomento de exposicións artísticas, charlas e coloquios, as presentacións de libros e documentais, a dinamización dos museos e do patrimonio cultural propio xunto coa defensa do profesorado, da calidade do ensino público e da educación en igualdade son a pedra angular de Alternativa dos Veciños.

5. Información ao Servizo da Veciñanza

Nun mundo cada vez máis deshumanizado, antisocial e preso da inmediatez e das novas rutinas de consumo, a poboación ten, paradoxalmente, máis posibilidades de sufrir desinformación.

Os medios de comunicación de masas queren exercer sobre nós a súa influencia tentando manipularnos, respondendo así a unha lóxica mercantilista na que prima a exclusiva e o morbo sobre o dereito a unha información veraz. Por estas razóns, os concellos teñen a obriga de garantir na medida das súas posibilidades e competencias a creación de espazos que sirvan á cidadanía para acceder a unha información de proximidade.

A creación dun voceiro municipal, a instalación de paneis electrónicos, o fomento dos medios de comunicación municipais como as redes sociais ou a páxina web e a creación dun servizo de queixas ou suxestións tanto físico como electrónico son medidas moi útiles que poñen en contacto á xente cos seus responsables políticos máis próximos e facilitan canles de información entre veciños e veciñas. Alternativa ten como obxectivo tamén recuperar a radio municipal en Sada para darlle unha utilidade pública da que nestes momentos carece.



6. Vida Cultural e Deportiva


Outro dos problemas fundamentais na nosa sociedade é que a cultura está sendo relegada a un papel residual dentro das políticas públicas. A veciñanza ten dereito a gozar de ferramentas que fagan a súa vida cultural máis rica: bibliotecas públicas, centros sociais e de lecer, obradoiros de lectura, escritura e infraestruturas, festivais de música, poesía e danza ou artesanía. O fomento destas e doutras actividades fan que conectemos de novo coa nosa orixe cultural e co inmenso patrimonio que, por sorte, temos na nosa zona.

O deporte é outro dos nexos de unión máis importante e enriquecedor entre veciños. Non pode ser que este concello careza a estas alturas duns equipamentos e dunha oferta deportiva municipal de calidade.





Desde Alternativa dos Veciños cremos tamén nas entidades deportivas como axentes sociais fundamentais na vida dun concello. Así, propoñemos a mellora dos equipamentos e infraestruturas do municipio, xa que na actualidade algúns deles preséntansenos nun estado precario, a dinamización das actividades deportivas e a creación de competicións, cursos e actividades de ámbito municipal. Todo isto encamiñado a facer do deporte un pilar básico na vida do concello, ampliando a oferta para mellorar o benestar da veciñanza.



7. O noso Medio Ambiente

Pensa no teu Concello. Pensa no lugar que ocupa no mapa. Non estamos nun punto privilexiado? Non é Sada un lugar cunhas oportunidades inmejorables? Por desgraza a mala xestión e a falta de preocupación pola contorna provocaron que Sada sexa máis coñecido como un núcleo urbano onde abunda o feísmo tan tristemente asociado a certas zonas de Galicia, onde o cemento gaña a batalla e os parques públicos brillan pola súa ausencia.

Un dos órganos vitais do proxecto político de Alternativa dos Veciños é a defensa do patrimonio natural e do medio ambiente. Son os nosos pulmóns. Os parques, as zonas verdes, a liña costeira, os ríos, os montes... A defensa dese patrimonio non é unha simple cuestión programática: está no noso ADN. Temos que loitar para mellorar a calidade das nosas praias, especialmente a das *Delicias*, xa que son un importante reclamo do noso municipio.




A loita contra o cambio climático a través de programas de minoración de residuos e da racionalización do consumo de recursos naturais, a prevención da contaminación e o control do impacto ambiental, a defensa das especies autóctonas, a loita contra os incendios e contra as especies invasoras que están a rematar coa nosa flora e fauna, o fomento da reciclaxe e a reutilización de recursos... son liñas de actuación prioritarias para Alternativa dos Veciños en materia medioambiental e forman parte do eixo de cada unha das nosas medidas.

8. Área Metropolitana e Servizos Mancomunados

Alternativa dos Veciños é un movemento que cre na xestión pública pero non nas duplicidades.

Moitos políticos están desexando crear novos entes e organismos para poder seguir vivindo das rendas. Nós defendemos e propoñemos a creación da Área Metropolitana como unha suma de forzas na que todos e todas gañamos. Sen duplicar cargos nin competencias. Un proxecto que sitúe a esta zona de Galicia á vangarda do Estado en moitos ámbitos. Desde Alternativa dos Veciños pensamos na Área como un ente que, fronte á fricción actual por certos intereses partidistas, sexa un instrumento que permita afrontar certas políticas de xeito conxunto e nunha dirección que mellore substancialmente a calidade de vida de todos os habitantes desta comarca.




Grazas a esa suma poderemos demandar a xestión conxunta de servizos a nivel metropolitano tales coma o tratamento de residuos, o saneamento e a xestión da auga, o transporte público, uns accesos viarios comarcais dignos ou a mellora da rede de saneamento e da seguridade viaria coa creación de beirarrúas en todas as localidades do noso municipio.

9. Honestidade, Transparencia e Participación Cidadá

Vivimos nun momento no que a cidadanía, cada día, está máis desencantada coa política. Este fenómeno cobra sentido desde o punto de vista da lacra da corrupción, que afasta ao político da veciñanza.

Ten sentido que unha persoa perda a esperanza na utilidade da política se cada día se destapan grandes escándalos de corrupción no seo dos grandes partidos, e mesmo nos de nova creación.

Así e todo, desde Alternativa dos Veciños defendemos a política como unha ferramenta da cidadanía para acadar o progreso e o benestar, sempre desde a honestidade e a comunicación coa veciñanza. Así o levamos practicando desde hai décadas a través dun sistema de asembleas nas que se conta coas entidades sociais e coa opinión directa da poboación para achegar a política ás veciñas e veciños.



Para Alternativa dos Veciños a transparencia non é unha promesa electoral, é o noso compromiso con todos e todas vós. As nosas portas están e estarán completamente abertas para escoitarvos e atendervos. Nós sempre actuaremos en defensa do interese xeral de Sada, para tentar acadar os maiores niveis de progreso e benestar en todas as localidades do noso municipio.

10. Única Alternativa para a Gobernabilidade

A experiencia que outorga a boa xestión é unha garantía de gobernabilidade. Alternativa dos Veciños leva anos demostrando que é posible gobernar en minoría e sacar adiante un municipio.



Existen concellos da Comarca da Coruña que, mesmo con maioría absoluta, son incapaces de sacar adiante orzamentos ou aprobar un Plan Xeral de ordenamento urbano. Iso non se pode permitir. É necesario mudar as cores desas corporacións e tinguilas de verde e amarelo. Só así se pode asegurar a gobernabilidade. Súmate a nós. Somos a Alternativa dos Veciños: comprometidos co local e pendentes dos problemas reais da veciñanza. Desde a experiencia, o diálogo, o traballo e o bo facer.

REFLEXIÓN FINAL



Agora que chegaches até o final queremos agradecer que dedicases o teu tempo a coñecer as nosas liñas de actuación. Gustaríanos facerche unha proposta: cando vaias ás urnas este próximo domingo 26 de maio, pensa con detemento se realmente o teu Goberno municipal está a cumprir co mandato das súas veciñas e veciños. Pensa se che gustaría vivir nun concello, cunha oferta cultural e de ocio máis ampla, con continua información sobre a xestión de goberno, cunhas políticas que permitan o desenvolvemento de todas as parroquias e non só do núcleo urbano.

Se cres que chegou o momento de que se teña en conta a túa opinión, de ter uns representantes con ganas de traballar, que se preocupen de verdade polo teu concello, polo futuro da mocidade, polos problemas reais da xente e polo progreso da comarca con máis potencial de Galicia, elixe este proxecto. Elixo Alternativa dos Veciños como garante de renovación. Por un concello e unha comarca singulares e distintos. **Hai Alternativa! Vota Alternativa dos Veciños.**

Alternativa dos Veciños, distintos



- 1 María Nogareda Marzoa
- 2 Breogán Blanco González
- 3 Agustín Alberto López López
- 4 Xisela Díaz García
- 5 Francisco José Vecino Pereiro
- 6 Roberto Carreira Abeal
- 7 Cristina Eiroa Núñez
- 8 Patricia Brandariz Sánchez
- 9 Paris Joel Ares Doval
- 10 Marcos Álvarez Maceiras

- 11 Antonia García Alonso
- 12 Carlos Darío Fernández Socastro
- 13 Gumersindo Varela Alvariño
- 14 María Carmen Blanco González
- 15 José Antonio Seijo Doldán
- 16 María Luisa López Castellanos
- 17 Joaquín Miguel Prieto Díaz

Suplentes

- 1 María de los Milagros Vázquez Iglesias

